



DATUK Dr Ling Liong Sik menyampaikan sijil penghargaan kepada tokoh-tokoh lama MCA

Cina perlu bersikap sederhana

Bahan asal dari Arkib
Negara Malaysia

Oleh AIRY LIM

KUALA LUMPUR, Ahad — Presiden MCA, Datuk Dr Ling Liong Sik meminta masyarakat Cina di negara ini bersikap sederhana, realistik dan rasional dalam setiap tuntutan serta harapannya.

"Masyarakat Cina juga perlu mengkaji dan menilai semula pencapaian serta kegagalan mereka untuk terus maju.

"Kita harus mengetepikan perbezaan masing-masing, sebaliknya menumpukan perhatian untuk mendapatkan kekuatan bagi menghadapi masa depan," katanya ketika berucap kepada lebih 3,000 anggota parti sempena sambutan ulang tahun ke-40 MCA, di Wisma MCA di sini petang ini.

Menteri Pengangkutan itu juga meminta masyarakat itu supaya terus membina negara ini secara bersama untuk melindungi kepentingan setiap warganegara Malaysia dalam setiap sektor.

Katanya, MCA dan masyarakat Cina tidak boleh berpecah belah dan "kita perlu mencapai kata sepakat dalam apa jua perbezaan yang ada untuk bersatu dalam usaha membina semula

bangsa Cina."

Menurutnya, hanya melalui persefahaman, kesabaran dan keikhlasan setiap masalah dan tuntutan yang dihadapi oleh masyarakat Cina dapat diatasi.

Negara ini, katanya sudah melalui perkembangan politik yang agak mencabar dan penting sejak beberapa tahun lalu.

"Perubahan politik itu memerlukan pemimpinan serta masyarakat yang berfikir waras, dewasa dan sabar," kata Datuk Dr Ling.

Sebelum itu, MCA memulakan sambutan ulang tahun itu dengan mengambil gambar bersama 65 pengasas parti di hadapan bangunan. Parti itu ditubuhkan pada 27 Februari 1949.

Ini diikuti dengan upacara penerimaan bendera parti oleh Datuk Dr Ling daripada sekumpulan 14 anggota Pergerakan Pemuda dan Wanita yang berjaya mendaki Gunung Tahan, Pahang, penyampaian cenderamata kepada tokoh lamanya dan persembahan kebudayaan.